

(2) Osoba izabrana u akademsko zvanje na Univerzitetu može biti angažirana u realizaciji nastavnog, nastavno-naučnog, umjetničkog i umjetničko-nastavnog procesa za sva tri ciklusa studija na drugoj visokoškolskoj ustanovi, a što se vrši na način i pod uvjetima utvrđenim Zakonom.

(3) Angažman osoba iz stava 1. ovog člana realizira se zaključivanjem ugovora između angažirane osobe i Univerziteta/organizacione jedinice.

(4) Univerzitet odnosno fakultet/akademija može sa kandidatom izabranim u konkursnoj proceduri za izbor u akademsko zvanje, a koji je imenovan na neku javnu dužnost, zaključiti ugovor za angažman u nastavno-naučnom procesu.

(5) Izabrani član akademskog osoblja iz stava 5. ovog člana izjednačen je u pravima i obavezama sa ostalim akademskim osobljem, a što se preciznije uređuje zaključenim ugovorom.

#### **Član 154.**

##### **(Gostujući profesor i angažman istaknutih osoba iz prakse)**

(1) Univerzitet odnosno fakultet/akademija može, na prijedlog vijeća/Senata, bez raspisivanja konkursa angažirati nastavnika sa druge, domaće ili strane, visokoškolske ustanove u svojstvu gostujućeg profesora.

(2) S ciljem upoznavanja studenata sa određenim naučnim/umjetničkim dostignućima, primjenom naučnih rezultata u praksi, praktičnim radom i drugim vidovima usavršavanja, Univerzitet odnosno fakultet/akademija može angažirati istaknutog naučnog radnika, umjetnika odnosno stručnjaka iz prakse da učestvuje u realizaciji dijela nastave na nastavnom predmetu na Univerzitetu odnosno fakultetu/akademiji, uz prethodnu saglasnost nosioca predmeta odnosno vijeća fakulteta/akademije.

(3) Odluku o angažmanu gostujućih profesora donosi Senat na prijedlog vijeća fakulteta/akademije.

(4) Angažman osoba iz stava 2. ovog člana, o kojem odluku donosi vijeće, a na prijedlog predmetnog nastavnika, može se vršiti do 30% sati nastave utvrđene nastavnim planom za taj predmet.

(5) Prava i obaveze angažiranih osoba u skladu sa stavovima 1. i 2. ovog člana reguliraju se ugovorom između Univerziteta odnosno fakulteta/akademije i angažiranih osoba na način i pod uvjetima utvrđenim Zakonom i općim aktima fakulteta/akademije.

#### **7.2.1. Uvjeti za izbor u akademska zvanja**

#### **Član 155.**

##### **(Opći uvjeti)**

(1) Akademsko osoblje koje je izabrano zasniva radni odnos na Univerzitetu odnosno fakultetu/akademiji za naučnu/umjetničku oblast ili za više srodnih nastavnih predmeta ukoliko ispunjava uvjete za izbor u odgovarajuće akademsko zvanje utvrđene Zakonom i ovim statutom.

(2) Period na koji se bira akademsko osoblje na Univerzitetu utvrđen je Zakonom.

(3) Član akademskog osoblja u zvanju docenta ili vanrednog profesora može biti izabran u više zvanje i prije isteka perioda na koji je biran ukoliko ispuni uvjete za izbor u više nastavno zvanje i ukoliko je:

- najmanje polovina radova objavljena u časopisima obuhvaćenim bazama podataka CC i/ili SCI–Expanded,
- u nastavi proveo najmanje tri godine nakon posljednjeg izbora.

(4) U izborni period ne uračunava se vrijeme provedeno na porodijskom odsustvu (bez obzira da li je ovo odsustvo iskorišteno u cijelosti ili ne), bolovanju dužem od šest mjeseci, period proveden na stručnom usavršavanju u inozemstvu.

### **Član 156.**

#### **(Minimalni uvjeti za izbor u nastavno-naučna zvanja)**

(1) Minimalni uvjeti za izbor akademskog osoblja u nastavno-naučna zvanja na Univerzitetu su:

- a) asistent: odgovarajući univerzitetski stepen sa najmanje 240 ECTS bodova i najnižom prosječnom ocjenom 8 ili 3,5;
- b) viši asistent: stepen drugog ciklusa studija, četiri godine iskustva u saradničkim poslovima, prosječna ocjena i na prvom i na drugom ciklusu studija 8 ili 3,5;
- c) lektor: stepen drugog ciklusa studija;
- d) docent: naučni stepen doktora u oblasti za koju se bira, najmanje tri naučna rada iz oblasti u koju se bira objavljena u priznatim publikacijama, pokazane nastavničke sposobnosti;
- e) vanredni profesor: proveden najmanje jedan izborni period u zvanju docenta, najmanje pet naučnih radova iz oblasti u koju se bira objavljenih u priznatim publikacijama, objavljena knjiga i originalni stručni uspjeh kao što je projekt, patent ili originalni metod, sve nakon izbora u zvanje docenta, te mentorstvo najmanje jednom kandidatu za stepen drugog ciklusa studija;
- f) redovni profesor: proveden najmanje jedan izborni period u zvanju vanrednog profesora, najmanje dvije objavljene knjige, najmanje osam naučnih radova iz oblasti u koju se bira objavljenih u priznatim publikacijama, sve nakon stjecanja zvanja vanrednog profesora, te mentorstvo najmanje jednom kandidatu za stepen drugog i trećeg ciklusa studija.

(2) Bliži kriteriji za izbor u nastavno-naučna zvanja utvrdit će se pravilnikom o bližim kriterijima koji donosi Senat na prijedlog vijeća grupacija Univerziteta, najkasnije šest mjeseci od dana stupanja na snagu ovog Statuta.

### **Član 157.**

#### **(Minimalni uvjeti za izbor u umjetničko-nastavna zvanja)**

(1) Ako je za nastavni predmet od naročitog značaja umjetnički kriterij, minimalni uvjeti za izbor u umjetničko-nastavna zvanja u koja se bira akademsko osoblje na nastavnim programima na Univerzitetu su:

- a) asistent: završen stepen prvog ciklusa studija sa najmanje 240 ECTS bodova i prosječnom ocjenom 8 ili 3,5;
- b) viši asistent: završen stepen drugog ciklusa studija odnosno stepen prvog ciklusa studija s najmanje 240 ECTS bodova ili ekvivalent i javno predstavljeni oblici umjetničkog stvaralaštva;

c) docent: završen stepen najmanje prvog ciklusa studija sa najmanje 240 ECTS bodova ili ekvivalent, veći broj javno predstavljenih oblika umjetničkog stvaralaštva i pokazani rezultati u nastavnom radu;

d) vanredni profesor: završen stepen najmanje prvog ciklusa studija sa najmanje 240 ECTS bodova ili ekvivalent, proveden najmanje jedan izborni period u zvanju docenta, veći broj javno predstavljenih oblika umjetničkog stvaralaštva, priznanja za uspješno djelovanje u odgovarajućoj oblasti umjetnosti i pokazani rezultati u nastavnom radu;

e) redovni profesor: završen stepen najmanje prvog ciklusa studija sa najmanje 240 ECTS bodova ili ekvivalent, proveden najmanje jedan izborni period u zvanju vanrednog profesora, veći broj javno predstavljenih oblika umjetničkog stvaralaštva koji su značajno doprinijeli razvoju kulture i umjetnosti te doprinos podizanju nastavnog i umjetničkog kadra.

(2) Bliži kriteriji za izbor u umjetničko-nastavna zvanja utvrdit će se pravilnikom o kriterijima za izbor u umjetničko-nastavna zvanja, koji donosi Senat na prijedlog Grupacije umjetnosti.

### **Član 158.**

#### **(Naučni, umjetnički i stručni uvjeti za izbor u akademska zvanja)**

(1) Naučni, umjetnički i stručni doprinosi kao jedan od obaveznih uvjeta za izbor u akademska zvanja su:

a) objavljena knjiga,

b) objavljeni naučni radovi,

c) objavljeno ili prihvaćeno izlaganje (referat) sa naučnog skupa (na domaćim i međunarodnim simpozijima, naučnim i stručnim skupovima i dr.),

d) učešće u naučnom projektu/naučnoj studiji i

e) učestvovanje u domaćim ili međunarodnim naučnim/umjetničkim ili stručnim skupovima koje organizira Univerzitet odnosno fakultet/akademija, a što se dokazuje određenim certifikatom.

(2) Radovi iz stava 1. tačke b) ovog člana smatrat će se relevantnim ukoliko su objavljeni u domaćim ili međunarodnim publikacijama koje prate međunarodne baze podataka, definirane u registru domaćih i međunarodnih bibliografskih baza podataka, koji uspostavlja Senat na prijedlog vijeća grupacija nauka/umjetnosti.

(3) Radovi iz stava 1. tačke b) ovog člana, objavljeni u publikaciji koju ne prate međunarodne baze podataka, smatrat će se relevantnim pod uvjetom da su recenzirani od najmanje dva recenzenta, o čemu kandidat dostavlja dokaz prilikom predaje prijave na konkurs za izbor u zvanje.

(4) Pokazani rezultati u nastavnom radu ocjenjuju se na osnovu rezultata evaluacije u skladu sa odredbama ovog statuta i općeg akta koji donosi Senat, održanih predavanja na drugim univerzitetima, te ocjene angažiranosti nastavnika u razvoju inoviranja nastavnog programa, zainteresiranosti studenata za izbor predmeta, uspjeha u napredovanju nastavno-naučnog i nastavno-umjetničkog podmlatka i sl.

- (5) Originalni stručni uspjeh, patent i originalni metod je izum u struci koji do sada nije otkriven ili postignut i koji ima kao rezultat nova rješenja u praksi koja se temelje na nekoj naučnoj ili umjetničkoj oblasti.
- (6) Javno predstavljeni oblici umjetničkog stvaralaštva podrazumijevaju i umjetnička djela koja nisu predstavljena široj javnosti, ali su vrednovana od predstavnika određene umjetničke struke.
- (7) Priznanje u odgovarajućoj oblasti umjetnosti podrazumijeva domaće i međunarodne nagrade ostvarene na relevantnim smotrama, festivalima, isključivo za kvalitet umjetničkog djela ili ukupno djelovanje u određenoj oblasti umjetnosti, kao i pozive za učešće na međunarodnim i domaćim festivalima, smotrama umjetničkog stvaralaštva, te pozive za gostovanja na drugim akademijama, značajnim projektima i radionicama.
- (8) Uspješni angažmani u stručnim organizacijama koje su značajne za razvoj kulture odnosno određene oblasti umjetnosti, te vođenje umjetničkih projekata, radionica.
- (9) Bliži uvjeti koji se odnose na univerzitetski udžbenik, katalogiziranu knjigu, utvrđeni su Pravilnikom o izdavačkoj djelatnosti Univerziteta.

#### **Član 159.**

##### **(Mentorstvo)**

- (1) Mentorstvo kao uvjet za izbor u odgovarajuća akademska zvanja podrazumijeva uspješno mentorstvo u drugom i trećem ciklusu studija, odnosno mentorstvo ostvareno u postupku stjecanja naučnog stepena magistra nauka ili doktora nauka po predbolonjskom sistemu, a koje za rezultat ima uspješno odbranjen završni rad odnosno magistarski rad/doktorsku disertaciju.
- (2) U slučaju da kandidat koji se bira u nastavno-naučno/nastavno-umjetničko zvanje iz objektivnih razloga nije mogao ispuniti uvjet mentorstva za drugi odnosno treći ciklus studija, umjesto mentorstva dužan je ispuniti uvjete u pogledu povećanja obima naučnih radova u skladu sa Zakonom.
- (3) Objektivni razlozi iz stava 2. ovog člana su:
- a) ako na fakultetu/akademiji nije organiziran studij drugog i trećeg ciklusa odnosno postdiplomskog studija, radi nedostatka kandidata za upis,
  - b) ako nijedan kandidat nije prijavio temu završnog rada odnosno magistarskog ili doktorskog rada iz naučne oblasti za koju se vrši izbor,
  - c) ako zbog broja kandidata u datom vremenskom periodu kandidat za izbor u određeno akademsko zvanje nije određen za mentora.

#### **Član 160.**

##### **(Pedagoško iskustvo)**

- (1) Kandidat koji se prvi put bira u nastavno-naučno/nastavno-umjetničko zvanje, a nije imao predmet iz pedagoškog obrazovanja, obavezan je, najkasnije godinu dana nakon izvršenog izbora, dokazati da posjeduje minimum pedagoškog obrazovanja.
- (2) Minimum pedagoškog obrazovanja podrazumijeva položene ispite iz programa pedagoškog obrazovanja, koji utvrđuje Senat na prijedlog matičnog vijeća grupacije nauka/umjetnosti.

## **Član 161.**

### **(Pristupno predavanje)**

- (1) Kandidat za izbor u akademsko zvanje docenta, a koji nije sudjelovao u realizaciji nastavnog procesa, obavezan je da održi pristupno predavanje iz nastavnog predmeta ili uže naučne odnosno umjetničke oblasti za koju je konkurirao.
- (2) Pristupno predavanje se održava pred studentima fakulteta/akademije za koji/koju se bira i komisijom za pripremanje prijedloga za izbor.
- (3) Pristupno predavanje se održava za studente one akademske godine (odnosno usmjerenja) na kojoj se izučava nastavni predmet odnosno uža naučna ili umjetnička oblast.
- (4) Ukoliko neki od članova komisije iz stava 2. ovog člana iz opravdanih razloga bude spriječen da prisustvuje pristupnom predavanju kandidata, vijeće fakulteta/akademije imenovat će njegovog zamjenika prema istim uvjetima kao i za imenovanje člana komisije.
- (5) Vrijeme i mjesto održavanja pristupnog predavanja vijeće fakulteta/akademije javno oglašava na oglasnoj tabli fakulteta/akademije.
- (6) Uspješnost pristupnog predavanja kandidata ocjenjuje komisija za pripremanje prijedloga za izbor, uzimajući u obzir rezultate ocjene predavanja od studenata.
- (7) Ocjena komisije iz stava 6. ovog člana sastavni je dio izvještaja koji se dostavlja vijeću fakulteta/akademije.

## **7.2.2. Postupak izbora u akademska zvanja**

## **Član 162.**

### **(Postupak izbora u akademska zvanja)**

- (1) Javni konkurs raspisuje Univerzitet na prijedlog Senata/nastavno-naučnog/nastavno-umjetničkog vijeća na osnovu utvrđene nastavne potrebe za akademskim osobljem ili izborom člana akademskog osoblja u isto ili više zvanje.
- (2) Javni konkurs se objavljuje u jednom dnevnom listu i na web stranici Univerziteta odnosno fakulteta/akademije.
- (3) Vijeće fakulteta/akademije utvrđuje potrebu za akademskim osobljem u skladu sa Standardima i normativima za visoko obrazovanje. Nastavna potreba se utvrđuje i s obzirom na broj izvršilaca na osnovu prosječnog opterećenja propisanog Standardima i normativima za visoko obrazovanje.
- (4) Konkurs za izbor akademskog osoblja raspisuje se za izbor u sva zvanja, a konkurs za izbor saradnika za zvanje koje je utvrđeno nastavnom potrebom.
- (5) Izbor u zvanje nastavnika i saradnika Univerzitet obavlja u roku od šest mjeseci od dana objave konkursa. Konkursi iz stava 4. ovog člana moraju se objaviti do kraja maja tekuće akademske godine.
- (6) Ako se na osnovu javnog konkursa iz stava 1. ovog člana ne izvrši izbor u zvanje, a nastavna potreba ostane nepromijenjena, Univerzitet je obavezan prije početka svake akademske godine blagovremeno raspisati javni konkurs za upražnjeno radno mjesto i okončati proceduru do početka akademske godine.

**Član 163.**  
**(Sadržaj konkursa)**

(1) Konkurs obavezno sadrži:

- a) akademsko zvanje sa naznakom relevantnih odredbi Zakona i ovog statuta,
- b) naučnu odnosno umjetničku oblast ili nastavni predmet za koji se vrši izbor,
- c) uvjete koje kandidat treba ispunjavati,
- d) vrstu radnog odnosa,
- e) potrebnu dokumentaciju koja se prilaže uz prijavu,
- f) rok za podnošenje prijave, koji ne može biti kraći od 15 dana od dana objavljivanja,
- g) adresu na koju se podnose prijave, sa naznakom kontakt osobe.

(2) Konkurs sadrži naznaku da se neblagovremene i nepotpune prijave neće razmatrati.

**Član 164.**

**(Prijava na konkurs za izbor u akademsko zvanje)**

(1) Kandidat za izbor u akademsko zvanje uz prijavu na konkurs u skladu sa traženom dokumentacijom prilaže:

- a) biografiju (CV) i spisak objavljenih naučnih/umjetničkih radova, programe javno predstavljenih oblika umjetničkog stvaralaštva, projekata, patenata ili originalnih metoda iz oblasti za koju se vrši izbor,
- b) diplomu i drugu dokumentaciju o stečenom obrazovanju,
- c) listu objavljenih knjiga, udžbenika i naučnih radova kao i same radove,
- d) dokaz o minimumu pedagoškog obrazovanja ako se kandidat prvi put bira u nastavno-naučno/nastavno-umjetničko zvanje docenta u skladu sa Zakonom i ovim statutom,
- e) podatke o nagradama i priznanjima u vezi sa odgovarajućom naučnom/umjetničkom oblasti,
- f) dokaz o uspješno obavljenom mentorstvu kod izbora u odgovarajuće akademsko zvanje.

(2) Pored dokumentacije iz stava 1. ovog člana, kandidat za izbor u umjetničko-nastavna zvanja prilaže i kritike za umjetničke radove.

(3) Dokaz o tri naučna rada kao ekvivalent za opravdano izostalo mentorstvo u slučajevima opravdanim u članu 158. stavu 3. ovog statuta.

**Član 165.**

**(Obaveze stručne službe u vezi sa konkursom)**

(1) Nakon isteka roka za prijavu kandidata na konkurs stručna služba fakulteta/akademije obavezna je u pisanoj formi potvrditi usklađenost pristiglih prijava sa uvjetima utvrđenim konkursom, naznačiti broj prijavljenih kandidata i akademsko zvanje za koje se kandidat prijavljuje.

(2) Potvrdu iz stava 1. ovog člana stručna služba dostavlja dekanu/direktoru fakulteta/akademije u roku od pet dana na daljnji postupak.

**Član 166.**

**(Komisija za pripremanje prijedloga za izbor)**

(1) Za pripremanje prijedloga za izbor u akademsko zvanje vijeće fakulteta/akademije imenuje komisiju za pripremanje prijedloga za izbor. Komisija se sastoji od tri ili pet članova

koji su izabrani u isto ili više akademsko zvanje od zvanja za koje su se kandidati prijavili. Većina članova komisije su iz uže, a ostali iz srodne oblasti.

(2) Komisija iz stava 1. ovog člana obavezna je podnijeti pisani izvještaj sa prijedlogom vijeću fakulteta/akademije u roku od 30 dana od dana isteka roka za podnošenje prijave, vodeći računa o ispunjenosti svih utvrđenih uvjeta za izbor u odgovarajuće akademsko zvanje.

(3) Sastavni dio izvještaja iz stava 2. ovog člana je i potvrda stručne službe iz člana 158. ovog statuta.

### **Član 167.**

#### **(Postupak izbora i način donošenja odluke o izboru)**

(1) Donošenje odluke o izboru u odgovarajuće akademsko zvanje vrši se na način i prema postupku utvrđenom Zakonom, ovim statutom i općim aktom fakulteta/akademije.

(2) U proceduri donošenja odluke o izboru u akademska zvanja obavezno je prisustvo izvjestioca (člana komisije) ili drugog ovlaštenog lica fakulteta/akademije sjednici Senata na kojoj se odluka o izboru donosi.

(3) U slučaju neprisustva osobe iz stava 2. ovog člana sjednici Senata na kojoj se odlučuje o izboru, predloženi izbor se neće razmatrati na toj sjednici.

### **Član 168.**

#### **(Oduzimanje akademskog zvanja)**

(1) Akademsko zvanje može biti oduzeto ako se dokaže da je naučni/umjetnički rad prisvojen ili krivotvoren ili je lažno ili na temelju falsifikata naveden neki od uvjeta za izbor.

(2) O oduzimanju akademskog zvanja odluku donosi Senat na prijedlog vijeća fakulteta/akademije.

### **Član 169.**

#### **(Postupak oduzimanja akademskog zvanja)**

(1) Prijedlog za pokretanje postupka za oduzimanje akademskog zvanja može pokrenuti podnosilac inicijative za raspisivanje konkursa za izbor u akademsko zvanje koje se želi oduzeti.

(2) Nakon prijema prijedloga za pokretanje postupka za oduzimanje akademskog zvanja vijeće fakulteta/akademije imenuje komisiju od pet (5) članova u istom ili višem zvanju u odnosu na zvanje kandidata koji je predmet postupka za oduzimanje akademskog zvanja.

(3) U komisiju iz stava 2. ovog člana ne mogu biti imenovani članovi komisije koji su bili članovi komisije u postupku kojem je osoba, protiv koje je pokrenut postupak, stekla akademsko zvanje.

(4) Komisija iz stava 2. ovog člana provjerava osnovanost prijedloga za pokretanje postupka za oduzimanje akademskog zvanja i pisani izvještaj dostavlja dekanu. Dekan u roku od 15 dana dostavlja izvještaj komisije predlagatelju postupka i licu protiv kojeg je pokrenut postupak da se u roku od 15 dana izjasne.

(5) Dekan saziva sjednicu vijeća najkasnije u roku od dva mjeseca od dostave odgovora predlagatelja pokretanja postupka i lica protiv kojeg je pokrenut postupak radi utvrđivanja prijedloga za oduzimanje akademskog zvanja.

(6) Na sjednicu vijeća pozivaju se predlagatelj i lice protiv kojeg je pokrenut postupak. Vijeće razmatra sve predložene dokaze i odlučuje o postojanju osnova za oduzimanje akademskog